

ԶՆիկօլն յակամայ ընկալաւ,
 Թղթով գըրով հնազանդեցաւ:
 Յետոյ դացին դուռն արքային,
 Պէրաթնի¹, էմրէր² հանեցին.
 Նիկօլն է առաջնորդ Հային
 Եւ հայրապետ Լովայ քաղքին:
 Քանի մ'ամիսք ի վրայ անցին,
 Թղթեր Հոռմայ փափէն եկին
 Ի ձեռքն Տէր Յովսէփին,
 Զուղայու աւագերիցին.
 Թէ, կաթողիկոսըն Մելքիսեթ
 Ընդ Ֆռանգաց ուխտ ու դաշն եղ.
 Ճահուկ³ գրքովք ձեռնադրանք ետ,
 Զմեզ այլագեցեացըն գերի ետ:
 Ապա Լեհցիքըն մեզ ասին,
 Մելքիսէթն թապի⁴ է փափին,
 Դուք ալ եկէք ի կրօնս Ֆռանգին.
 Ապա չէք հնազանդ, ձեր գլխին:
 Տեսէք, թէ ինչ բերին մեր գլխին
 Սուտ անխրաւ առաջնորդին.
 Սուրբ հարքն զմեզ արեամբ գնեւ
 [ցին,
 Այժմուն վարձկանքըն կորուսին:
 Կաթողիկոսն յետոյ մեռաւ.
 Հայոց գլուխն շատ բան անցաւ,
 Եպիսկոպոսն ալ զօրացաւ.
 Ընդ ազգս Հայոց մաքառեցաւ.
 Անօրէնըս խորհեցաւ.
 Պատուիրանացն ի դուրս ելաւ,
 Ֆռանկաց հաւատըն հաճեցաւ,
 Լուսաւորչին չհաւանեցաւ:
 Ելեալ գընաց ի Կամենից,
 Եւ անդ արար ըզգործ մլասից.
 Ելաւ նա յԱստուծոյ աչից,
 Զօրէնս Հայոց ետ կոխ օտից:
 Մինչ դեռ նա էր գործըս շարին,
 Քակէր զօրէնս և գաւանդնին,

Հասաւ Գրիգոր Կեսարացին,
 Յանդիմանեաց զնա յատենին.
 « Վասն է՛ր քակես դու զկարգն
 [Հային.
 Ունկն չդնես դու կանոնքին.
 Խախտիչ եղեր մեր սահմանին.
 Հարցէ՛ զքեզ օձն անջըրդին »:
 Նիկօլն եղև նմա դիմադարձ՝
 Մեծ վարդապետին դասասաց.
 « Ես եմ ասէ էմրով նստած.
 Իսկ դու ո՞վ ես, հանած վարած »:
 Ապա եղև փըքով լըցած՝
 Զինչ զպիղծ շուն և կատաղած.
 Զեկեղեցին արար կպղած.
 Զնա արտաքսեաց յեկեղեցեաց.
 Ապա մօտ ստարօստան գընաց
 Եւ զվարդապետն չարխօսեաց.
 Ասաց. « Չաշուս՝ թուրքէն եկած,
 Խռովեցուցիչ, և մեծ հերձուած »:
 Պարօնն զրկեց մարդ Գրիգորին,
 Թէ, բերէք զնա իմ առաջին
 Դատեմ ըզնա զինչ զխային.⁵
 Ըստ Նիկօլայ դատախազին:
 Յորժամ Հայերըն զայս լսեցին,
 Ծերք և տըղայք դուրս վազեցին.
 Գնացին ի բերդըն մօտ Պարօնին.
 Ասեն. Ամենքս եմք տէր սըմին.
 Սա վարդապետ է անուանի
 Եւ պատրիարգ Ըստամպօլի.
 Սուրբ է սրօրիւ առաքինի.
 Զուտէ սա միս, չըմպէ գինի:
 Պարօն լըսեց և իմացաւ.
 Զարաց երեսնին սեւացաւ.
 Եւ Գրիգորն ի մեծ սուգ մտաւ,
 Զեկաւ Լոմն, այլ հետ դարձաւ:
 Իսկ ժողովուրդըն զիմեցին
 Ի դարպաս եպիսկոպոսին.

1. Հրովարտակ: — 2. Հրամանադիր: — 3. Զանկեցոյ կամ Ունիթորաց, իբր թէ Լատինաց ժխով: — 4. Թուրք. հնազանդ, հպտակ: — 5. Թրք. մատնել, նենգաւոր: